

## SOS CANTADORES

Su palcu inserradu a laru  
a furriu ghirionadu  
de lughes e de colores,  
un'alipedde in bolu,  
pro sa festa 'e Portolu  
amus sos cantadores.

In sa prazza sa Pruna  
tres lantias faghen luna  
e una luna est in chelu  
estida in grogu pannu,  
cun ricamos de oro.

Santu Portolu Mannu,  
pro bos festare occannu,  
mannos de Logudoro  
sun bennidos dae tesu:  
est unu banaresu,  
s'atteru 'e Iddanoa,  
e su ch'an postu in mesu  
est de terra onolvesa.

Faghide bona resa,  
ponide s'esordiu in bia,  
sa gara 'e poesia  
an isettadu un'annu;  
accostadu an s'iscannu,  
sun prontos sos de terra.

B'at laru da onzi perra  
b'at lughes e colores,  
ma si cherides fama,  
si bramades onores,  
fichidos in su palcu  
devides fagher ghera.

B'at laru da onzi perra  
ma prima unu saludu,  
cun su bonett'arziadu,  
a su gentile pubricu,  
s'illustre comitadu;

in palas, mesu cuadu  
sezzidu est su tenore  
cun boghe armoniosa,  
s'intendet a indedda,  
faghet semper "bim-bai".

"Collega non andes gai!"  
"lassa s'appedda-appedda!"  
"Ti passo s'arridore!"  
"Ti la premo sa bua!"

Ma lassade sas begas,  
allentade sa fua,  
su comitadu, a cua,  
dispostu at s'argumentu  
dan su tema, partide  
onzun'in sa 'ia sua.

Como fin'a sas duas  
faghidennos divertire,  
lassadennos un'ammentu,  
un'alideddu 'e ventu  
movet sas lampadinas;

ponidebos in assentu,  
pesade pro sa duina,  
duos ziros de battorina  
fin'a sa tarantella.

Ma in custa notte bella  
b'at finas zente sonnida,  
e mancan galu tres modas  
a concludere sa faina;

in custa notte 'e ispantu  
gloria a s'Apostolu Santu  
e Martire Dizzosu.

A un'atter'annu adiosu,  
bona notte e ... reposu!

## I POETI IMPROVVISATORI

*Il palco cintato d'alloro / tutt'attorno ornato / di luci e colori, / un pipistrello in volo, / per la festa di Bartolomeo / abbiamo i "poeti estemporanei".*

*In piazza "Sa Pruna" / tre lampioni fanno luna / e una luna sta in cielo / vestita in giallo panno, / con ricami d'oro;*

*San Bartolomeo Grande, / per festeggiarti quest'anno, / tre grandi del Logudoro / son venuti da lontano: / uno è banarese, / l'altro di Villanova, / e quello che han posto in mezzo / è di terra bonorvese.*

*Fate buona resa, / mettete l'esordio in via, / la gara di poesia / hann'aspettato un anno / avvicinato han la sedia / son pronti quelli a terra.*

*C'è alloro da ogni parte / ci son luci e colori, / ma se volete fama, / se bramate onori, / all'impiedi sul palco / dovete farvi guerra.*

*C'è alloro da ogni parte / ma prima un saluto, / con il berretto alzato, / al pubblico gentile, / all'illustre comitato;*

*alle spalle nascosto / è seduto il tenore / con voce armoniosa, / si sente da lontano, / e fa sempre "bim-bai".*

*"Collega non proseguire a quel modo!" / "lascia l'abbaia abbaia!" / "ti passo la baldanza!" / "ti premo la ferita!"*

*Ma lasciate le beghe, / rallentate la fuga, / il comitato, in segreto, / ha scelto l'argomento / danno il tema e partite / ognuno per la sua strada.*

*C'è tempo fino alle due / fateci divertire, / lasciateci un ricordo, / un alitino di vento / fa muover le lampadine;*

*sistematevi bene, / alzatevi per la "duina", / due giri di "battorina" / fino alla tarantella.*

*Ma in questa notte bella / c'è anche gente assonnata, / e mancano ancora tre "modas" / per compiere l'opera;*

*in questa notte di meraviglia / gloria all'Apostolo Santo / e Martire famoso.*

*A un'altr'anno / Buona notte e buon riposo!*